

02 FEB 2001

Wetland-Air

TAMAN WETLAND PUTRAJAYA BERFUNGSI SEBAGAI PENAPIS AIR SEMULAJADI

PUTRAJAYA, 2 Feb (Bernama) -- Taman Wetland Putrajaya seluas 650 hektar yang dirasmikan oleh Perdana Menteri Datuk Seri Dr Mahathir Mohamad hari ini memainkan peranan sebagai medium pembersihan air yang mengalir ke Tasik Putrajaya.

Presiden Perbadanan Putrajaya Tan Sri Azizan Zainul Abidin berkata, taman yang berfungsi sebagai "penapis" itu akan memerangkap sedimen dan lain-lain bahan pepejal terampai serta menyerap bahan toksik dan nutrien yang berlebihan.

"Ini agar kualiti air Tasik Putrajaya dapat dikekalkan pada tahap yang sesuai untuk rekreasi air dan mandi-manda," katanya ketika berucap sempena upacara perasmian Taman Wetland oleh Dr Mahathir di sini, hari ini.

Untuk mencapai fungsi sebagai "penapis air semulajadi" itu, Wetland Putrajaya, kata Azizan, telah ditanam dengan 12 juta pokok daripada lebih 70 spesis tumbuhan wetland secara berperingkat-peringkat.

Taman Wetland Putrajaya, yang merupakan sebahagian daripada kawasan tanah lembap Putrajaya merupakan tanah lembap buatan manusia yang pertama di Malaysia dengan mengempang Sungai Chuau dan Sungai Bisa.

Ia merangkumi sebahagian kawasan Tasik Putrajaya, sel-sel wetland dan kawasan sekitarnya mula dibina pada 1997.

Azizan berkata, adalah diharapkan Taman Wetland ini akan menyumbang ke arah mempertingkatkan perasaan cinta di kalangan penduduk Putrajaya dan pelawat ke bandar ini terhadap alam sekitar.

Beliau berkata, pelbagai kemudahan telah disediakan bagi para pengunjung termasuklah Pusat Penghayatan Alam yang menampilkan satu pameran komprehensif mengenai wetland secara amnya dan Wetland Putrajaya secara khususnya.

"Kami berharap orang ramai akan mengguna kemudahan-kemudahan ini sepenuhnya dan membantu kami dalam membangun dan memelihara taman ini untuk dijadikan warisan kepada generasi akan datang," katanya.

Selain itu, Taman Wetland Putrajaya juga merupakan habitat bagi burung Merbok, yang biasa ditemui sama ada berpasangan atau sekeluarga di pelantar makanan burung yang disediakan atau di pucuk-pucuk pohon sekitarnya.

Yang turut hadir pada majlis perasmian itu adalah Menteri Sains, Teknologi dan Alam Sekitar Datuk Law Hieng Ding, Menteri di Jabatan Perdana Menteri Datuk Pandikar Amin Haji Mulia dan Ketua Setiausaha Negara Tan Sri Samsudin Osman.

-- BERNAMA

MHI ES PR